

Pauru Nymerohpyry sero Titu Neneryme

Sero pape tymerose Pauru a. Ritonôpo nymenekahpyryme kynexine ynororo imehnô amorepaneme. Tynmerohpyry sero taropose eya Titu neneryme. Pauru maro toytose Titu tuhke pata tō poro. Imeipo Jezu poetory amorepaneme toehse ynororo Kereta po.

Tynmerohpyryae Titu zurūko mana enekunohtohkō poko. “Azahkuru imehnô amorepāko mā toto. Zae Ritonôpo ehtoh sā pyra roropa mā toto,” āko mana. “Naeroro kurākō rokē imenekako imehnô Jezu poetory amorepananōme, imehnô motye osekaroptyra toto ehtohme oxiehno pyra roropa toto ehtohme,” āko mana.

1 ¹Ynymerohpyry moro oneneryme Titu. Ywy ase Pauru, Ritonôpo poetory, Jezu Kyrixtu nenyokyhpyry.

Tymenekase ywy Ritonôpo a tynymenekatyā akorehmatohme aomiry enetupuhpotohme eya xine, zae omi kurā poko toto amorepatohme roropa.

²Orihpyme tymaro kyritorŷko Ritonôpo mana. Ajohpākara mokyro Ritonôpo. Pake nono onyriptyra ro tahtao ynara tykase ynororo tyya rokene, “Orihpyme ypoetory tō rīko ase,” tykase. ³Mame tōmiry enehpory se toehse Ritonôpo ahtao tonehpose eya kyya xine. Tōmiry tokarose roropa ya ekarotohme imehnomo a, ynara katohme eya xine, “Umūkuru enetuputyryhtao oya xine, orihpyra oritorŷko ase, jūme,’ kaxiko eya xine,” tykase ya Ritonôpo kukurākanekomo.

⁴Umūkurume mase Titu, Jezu Kyrixtu tonetupuhse oya exiryke.

Ynara āko ase Ritonôpo a, “Papa, Titu pyno ke exiko. Torētyke pyra tyriko roropa,” āko ase. Jezu Kyrixtu a morara āko roropa ase kukurākanekōme exiryke.

Titu erohtopōpyry Kereta po

⁵Kynomoase moroto ahmōta po Kereta po, morotōkō akorehmatohme otyhkara ro jexiryke, Jezu poetory amorepatōkō ritohme oya emero pata tō punero. Nnyrohmanohpotopōpyry poko oya wenikehpyra exiko. ⁶Zae rokē exiketō Jezu poetory amorepaneme tyriko, toiro typye exiketō rokene, Jezu enetupuhnanō ke typoenōke rokene. Ajoajohpe pyra typoenōke exiketō tyriko, tumyko omipona typoenōke roropa. ⁷Ritonôpo omi poe Jezu poetory amorepananō ahtao imehnō mā toto onyhxiropyra kure rokē toto exiryke. Osenetaonohpyra exiketomo, atakirimahnomo, etŷpyra exiketomo, zehzehno

pyra exiketomo, tyamene se pyra exiketomo, ⁸katonõ se exiketomo, kurãkõ maro se exiketomo, emotyêkara exiketomo, zae rokê imehnõ rinanomo, Ritonõpo sã se exiketomo kure rokene, akíme pyra exiketomo, ⁹zae omi onurumekara exiketomo zae exiryke, Jezu namorepatopõpyryme exiryke. Morara tahtao xine imehnõ zurûko toh mana, toto akorehmãko zae Ritonõpo omi poe. Azahkuru exiketõ namorepatopõpyry enepõko roropa toh mana.

¹⁰Tuhke ajoajohpãkõ nae. Juteu tõi roropa Jezu enetupuhxîpo toeramase ropa toto. Ipoetohpyryme mã toehse toto. Imehnõ amorepãko toto azahkuru rokene. Toto enekunohnõko mã toto. ¹¹Mokaro imynyhpãkapoko imehnõ enekunopyryino. Tyekyrykõ omipohtomãko toh mana, zae pyra toto amorepãko, tineru apoitohme rokê tyya xine. ¹²Typoko xine ynara tykase imepyny, “Keretapõkõ emero ajoajohpe mana osekato kõi samo. Akíme roropa mã toto, tõtukurukõ poko emotyêkãko toto,” tykase mokyro Keretapono typoko xine ro imehnõ netaryme. ¹³Mokyro nekarohpyry ajohpe pyra mana. Morara exiryke mokaro zuruko orẽpyra samo, mãsa rokê pyra Ritonõpo omipona toto ehtohme. ¹⁴Juteu tamuru tõi omihpyry irumekapoko eya xine imeimehnõ nyrohmanohpotoh roropa. Zae omi rumekahpõkõ nyrohmanohpotoh irumekapoko eya xine. ¹⁵Kure exiketõ mã kure Ritonõpo nyrihpyry ekarõko. Yrome iirypymãkõ mã popyra Ritonõpo nyrihpyry ekarõko zae pyra toexirykõke. Tyrypyrykomo a rokê tuaro mã toto. ¹⁶Moro saaro imehnomo, “Ritonõpo waro ynanase,” ãko toh mã repe. Yrome kure ehtoh poko pyra mã toto. Popyra ipunaka mã toto Ritonõpo neneryme. Imeimehnõ zehno mã toto Ritonõpo omipona pyra. Kure imehnõ riry waro pyra mã toto, enara.

Zae omi poko

2 ¹Yrome omoro tyoro, mokaro sã pyra. Zae omi ekaroko Jezu poetory tomo a. Ynara kaxiko eya xine, “Ritonõpo omipona ehtoko,” kaxiko. ²Tãhpomãkõ zuruko kure toto ehtohme, ajoajohpe pyra, emotyêkara roropa toto ehtohme tõtukurukõ poko, mãsa rokê pyra Ritonõpo enetupuhthohme toto a, imehnõ pyno toto ehtohme, Ritonõpo omipona exiry poko penekhepyra roropa toto ehtohme. ³Morararo kunumiximãkõ zuruko kure toto ehtohme Ritonõpo poko exiketõ samo, imehnõ onykerekeremara toto ehtohme, eukuru jehnahpyry poko penetara toto ehtohme roropa. Zae omi poko imehnõ amorepapakoko eya xine. ⁴Oryximãkõ amorepapakoko toto a, tyniokõ pyno toto ehtohme, typoenõkõ pyno roropa aehtohkõme, ⁵Ritonõpo omi poe tuaro toto ehtohme, imehnõ orutua poko pyra oryxia ehtohme, tytapyikõ tao rokê kure toto ehtohme, tyniokõ omipona toto ehtohme roropa. Tyniokõ omipona pyra Jezu poetory ahtao imehnõ ynara ãko toto eneryke tyya xine, “Otarãme Ritonõpo omiry se hkopyra mokyro mana,” ãko toto ipoko.

⁶Nuasemãkõ roropa zuruko ajoajohpe pyra toto ehtohme. ⁷Titu, kure rokê imehnõ tyriko, asã nuasemãkõ ehtohme. Zae imehnõ amorepako Ritonõpo omiry poko. Onekunohtõ sã pyra exiko. ⁸Omi rypyry poko pyra exiko,

ohxiropyra imehnõ ehtohme. Morara awahtao kyzehnotokõ ehxirõko tamoreme xine mana, ohxiropy se exiketomo. Kure rokẽ oexiryke ohxiropyra mã toto.

⁹Ynara kaxiko namotome exiketomo a, “Oesẽkõ omipona ehtoko. Kure rokẽ erohtoko, oseosezuhpyra. ¹⁰Ematonara ehtoko. Kure rokẽ erohtoko. Morara awahtao xine ynara ãko imehnõ oenerykõke, ‘To! Tukurãkanekõ omipona rukuh mokaro toehse nahe,’ ãko mã toto oenerykõke,” kaxiko eya xine.

¹¹Ritonõpo kuamorepatose kure toexiry poko, kypyno xine toexiryke, emero porehme repe. ¹²Ynara kuamorepatorỹko mana, kyyrypyrykõ rumekatohme kyya xine, Jezu poetory tõ kara penetatopõpyry rumekatohme roropa kyya xine, zae kuehtohkõme kukurohtao xine, zae roropa imehnõ neneryme kuehtohkõme, zae Ritonõpo neneryme kuehtohkõme roropa taro nono po. ¹³Morara kuexirykõ se Ritonõpo mana. Tãkye rokẽ sytatose Kuesẽkõ oepyry ropa eraximaryke kyya xine. Orẽpyra oehnõko ropa mana. “Kure Ritonõpo mana, kukurãkanekõ imehxo,” ãko sytatose emero porehme, Jezu Kyrixtu oepyry ropa eneryke kyya xine. ¹⁴Mokyro tõsekarose toorihthome kymyakãkõme, kyjamihtanohtohkõme, kyyrypyrykõ poko pyra kuehtohkõme, kukurohtao xine kukurikatohkõme roropa, ipoetoryme nymyry kuehtohkõme, mãsa rokẽ pyra aomipona kuehtohkõme.

¹⁵Moro poko imehnõ amorepako. Zuruko toto orẽpyra, tyrypyhpyke toehse toto ahtao. Ynara kaxiko eya xine, “Jomi poe rokẽ pyra ourutorỹko ase, Ritonõpo omi poe ourutorỹko ase,” kaxiko, ynara kara toto ehtohme, “Poetome ro mase. Òmiry onetara ynanase,” kara toto ehtohme.

Kure rokẽ Jezu poetory exiry poko

3 ¹Ynara kaxiko roropa Jezu poetory tomo a, “Kowenu omipona ehtoko. Kowenu poetory omipona roropa ehtoko. Kure rokẽ erohtoko erohse oeahmarykohtao. ²Imehnõ onykerekeremara ehtoko. Atatapoiipyra roropa ehtoko. Sekerereme ehtoko imehnomo a, kure rokẽ imehnõ ezuhtoko,” kaxiko. ³Pake ajoajohpãkõ sã sexiataose, Ritonõpo omipona pyra, popyra rokene. Jezu poetory tõ kara penetatoh poko typenetase kymarokomo, tãkye kuexirykõ poko roropa typenetase imehnõ zetũ poko, imehnõ zumoxike ehtoh poko roropa. Imehnõ kyzehno xine toh nexiase. Toto zehno ynanexiase roropa. ⁴Yrome Ritonõpo kukurãkanekõme mana. Kuamorepatose kypyno xine toexiry poko, kure kyrirykõ se toexiry poko roropa. ⁵Mame kypynanopyatose kure kuexirykõke pyra. Kypyno xine toexiryke kypynanopyatose iirypyryme ro kuahtao xine. Kurã Zuzenu a kukurikapoatose enurusenã sã ropa kuehtohkõme, kure kuehtohkõme kukurohtao xine. ⁶Omomyra Ritonõpo toehse. Tuzenu tokarose kyya xine, toorihse Jezu Kyrixtu exiryke kyyrypyrykõ ehehpyryme. ⁷Tuzenu tokarose kyya xine zae kuehtohkõme. Kure rokẽ kyritorỹko Ritonõpo mana. “Zae matose,” ãko Ritonõpo mana kyya xine. “Ymaro aarotorỹko ase orihpyra oehtohkõme jũme,” ãko mana. Morara kary eraximãko sytatose eya. ⁸Morara kary ajohe pyra mana.

Morara exiryke orẽpyra exiko moro ekarory poko Ritonõpo enetupuhnanomo a kure rokẽ imehnõ ritohme toto a. Morara ahtao kure sytatose Ritonõpo neneryme, imehnõ neneryme roropa. ⁹Yrome putupyra exiketõ oseosezukuruhtao anaponuhpyra exiko tytamurukõ esety poko, Moeze omihpyry poko roropa toto oseosezukuruhtao toto anaponuhpyra exiko. Toipãme rokẽ sekere ãko mã toto. ¹⁰Imehnõ azahkuru Jezu poetory amoreparyhtao zuruko toto osemazuhme aporo. Morotoino amorepazomoko ropa toto. Moraramẽ õmipona pyra toto ahtao imaro xine pyra exiko. ¹¹Zuaro mase toto osenekunopyry waro mase. Iirypyryme toto exiry eneryke oya zae pyra toto exiry waro mase.

Pauru nurutopõpyry etyhyryme

¹²Arytema aropõko ase oya. Arytema pyra ahtao Tikiku aropõko ase aarotohme, Nikopori pona. Moroto exiko ase ikonoporyae. ¹³Zena makorehmatase, Aporu maro ooepyryhtao. Zena, Roma kowenu omiry waro exikety. Akorehmako toto tỹkyryneke toto ehtohme toto ytoryhtao. ¹⁴Imehnõ akorehmapoko roropa Jezu poetory tomo a etuarimaketõ pyno toto ehtohme, toipãme rokẽ pyra toto ehtohme.

¹⁵“Kure pãna mã moero,” ãko oya ymarõkomo. Morara ãko roropa ase amarokomo a, yna pyno exiketomo a, Jezu poetory tomo a.

“Papa, Titu tõ pyno exiko,” ãko ase Ritonõpo a. Enara rokene.



(Tit 3.14)